

KATABWENAAN MOAN KATEAN TE KILGA

E katabwenaaki moan katean Aia Rabwata Kauntira i Kiribati n te maroro are e wakinaki man 11-12 Okitobwa, 2011, n aobitin te MISA i Bairiki.



Kain te maroro—Aika a tei (L-R) – laokim Tooma, (Mayor Butaritari), Romano Reo (Mayor BTC), Imota Tamoa (Mayor Tamana), Terib'ata Etekia, (Mayor Nonouti), Birimaka Tekanene (Solicitor-General, OAG), Bwereata Teatu, (Mayor ETC). Aika a tekateka (L-R) Liza Tokataake (Clerk, BTC), Tokia Greig (Mayor, TUC), Dephew (Tebwe) Kanono (Secretary, MISA), Rereieta Teikori, (Unimwane Association, Betio), Biribo Teriba (Unimwane, TUC), Amina Uriam (Director, LGD, MISA).

E kainaki te maroro aei irouia onoman Meeia aika Romano Reo, (BTC), Tokia Greg (TUC), laokim Tooma (Butaritari), Bwereata Teatu (Tarawa I Eta), Terib'ata Etekia (Nonouti) ao Imota Tamoa (Tamana), ao n raonaki irouia taan tei man botaki n unimwane mai i aon Tarawa, ao aobitia man ana botaki te Tautaeaka tabeua. E kaukaki te maroro iroun Hon. Ioteba Redfern, te

Minita Ibukin Reibwa ao ao ni kainaki iroun Dephew Kanono, te Tia Koroboki n te MISA.

Aia Rabwata Kauntira i Kiribati, bon te botaki are e kainaki irouia Kauntira, are e na mwakuri bwa te NGO ibukin biriakinan waki ma karikirake ibukin

boutokaia ao buokaia Kauntira.

N tain te maroro ao a kabwataki kaoti i aon karaoan ana Ointua (Constitution), ana Kainibaire ni Karikirake (Strategic Plan), ao tabeua riki. E baireaki naba bwa e na teweaki aia Bwabwaro Meeia ni

kabane i aon Kiribati ibukin katean raoi te botaki aei, are e katautauaki nakon moan 2012.

E kabwataaki naba aia birimwane Kauntira ae \$1,000 n te ririki ao aran te botaki n te Taetae n Imatanga ae te *Kiribati Local Government Association*, ma kauarerekeana ae KiLGA.

Bowin Aia Rabwata Kauntira n te Betebeke

E boaki te bowi ibukia taani kairi n Aia Rabwata Kauntira, (Local Government Associations ke LGA) n te Betebeke, i Suva i Biti man 30 Novembwa, 2012, are e katuruturaki iai te reirei i aon anga ibukin

karekean te buoka man Botakin Aban Eurobe (European Union).

E kairaki te reirei iroun Petrus (Peter) Theunisz, te bwakuaku temanna are e katabeaki ibukin rina-noan karikirake ake a

roko n te EU ao botaki riki tabeua. E raonaki irouia aobitia man te FSPI ao Karibaiti Taoaba, te Manatia n CLGF, are e mena aobitina i Biti.

Reitana n It. 4

Kanoana aika kakaongora

- Tera bonganan Aia Rabwata Kauntira? Warekia n It. 3;
- Mwin aia bowi taan tei man aia Rabwata Kauntira n te Betebeke, It. 1 ao 4;
- Kaukan te Mauri Festival n te Betio Town Council, It. 2;
- Ana bowi te Pacific Urban Forum are e iraki iroun ana tiim Kiribati, It. 2

Ana Bowi te Pacific Urban Forum

E kania 60 taan tei man wanua aban nako te Betebeke are a ira bowin te Pacific Urban Forum, are e boaki ni kawan Biti ae Nadi man 29 Novembwa nakon 2 Ritembwa, 2011.

E katuruaki te maroro i aon tenua boto n iango bwa teuana, katamaroan te reitaki imarenaia Kauntira ma Botaki ni Babaire ibukin Karikirake (national planners), uoua, kakaeen kateibwai aika a bubura ((infrastructure) ibukia taian taun ake a na teimatoa tamaroiaia, ao tenua, kawai ibukin nikoan ana urubwai bibitakin kanoan bong (climate change) nakon taian taun.

E iraki te maroro aei mai Kiribati iroun te tiim ae niman kaina ake a kairaki iroun te Aobitia man te MISA ae Bouataake Tengkam ao n raonaki iroun te Kiraaka man te BTC ae Nei Eliza Tokataake, Tarakabu Tofinga (Lands),



Kain te maroro n te Pacific Urban Forum, ke aia Bwabwaro kain te Taun n te Betebeke, Novotel Hotel, Nadi, Fiji

Kaitu Tangira (BTC) ao Kaitangiman Bio (TUC).

Teuana naba te botoniango are e maroroakinaki bon karekean anga ibukin nikoan te mwaiti n aomata ao te ibetutu n taian taun. E noraki bwa e tabe n ririkirake mwaitia kain te taun n te aono n te Betebeke are e katatauaki bwa e na roko n te mwaiti ae 15 te mirion imwin 25 te ririki ae imwaira

man te mwaiti ae 10 te mirion n te tai aei.

E na teimatoa rikirken te mwebuaka n taian taun ma maeka ake a uakan ma ngaia, man rikirken mwaitia kain te taun, ao n taian te maroro ao a katereaki kawai ibukin toto koan kanganga aikai.

E noraki raoroin ana waki te Pacific Urban Forum bwa te tia tei imarenaia aba

ibukin bobotan iango ma karikirake ake a na buoki kanganga n taian taun.

A rawata taan rabakau ibukin te waki aei ake a roko n anga aia buoka nakon te maroro.

Aba ake a roko bon Biti, Kiribati, Babua Nu Kin, Tamoia, Toromon, Tonga, Tuvalu ao Vanuatu.

(E rairaki man te CLGF Newsletter, December issue)

RONGORONGON MAN KAUNTIRA

BETIO TOWN COUNCIL

E anga ana taeka ni butimwai te Meeia mai Betio ae Romano Reo nakon te Beretitenti, Anote Tong, ao irua ake a roko ni kaukan te Mauri Festival, n te Kanimabong 23 Ritembwa, 2011 n te Sports Complex i Betio.

E kaotia te Meeia bwa e bongana te Mauri Festival nakon Betio bwa e aki ti uota te kukurei ao te kakibotu nakoia aomata ma e buoka naba te rau irouia te roronrikirake, ake a bwaroakina te Sports Complex ni karaoa aia

kamataku ao ni kakibotu ma raoraia.

E kaukaki te Runga iroun te Beretitenti, Anote Tong, are e taekinna bwa e bongana te Runga ibukin kuangakin aia tarena ni mwaie ao n anene te roronrikirake i aon Betio ao Kiribati.

E raka i aon teubua mwaitia kain te roronrikirake, n aia kurubu aika a kakaokoro, ake a karaoi aia kamataku nakoia irua ma aomata ake a ira te bong ni kaukuki anne. Temanna te tia



Romano Reo, te Meeia man BTC n tain kaukan te Mauri Festival

anene are e roko mai Nutiran bon Dr. David Langston.

E aitara raoi te Runga ma rokon te karau, are e bwaka n te moantai n tairikin te kaukuuki anne.

Tera Bonganan ao Taben Aia Rabwata Kauntira (Local Government Associations (LGA))?

Moan kateana te LGA

E moan kaungaki katean Aia Rabwata Kauntira (LGA) i Kiribati n 2007 iroun n ana waki te karikirake ae te Commonwealth Local Government Forum (CLGF), aia Botaki Tautaeka i Nanao n te Kaomwanwareta, are e aobiti i Biti.

N te ririki 2009, ao e teweaki aia bwabwaro taani kairi mai i aon Kiribati iroun te Tautaeka man ana buoka te CLGF, are e boaki n te Otintaai Hotel. A roko n te bwabwaro aei Meeia ao Tia Babaire man Botaki n Unimwane man Kauntira ake 23. Teuana mai ibuakon aia moti bon katean Aia Rabwata Kauntira (LGA).

Inanon 2010, ao e a tei aia Rabwata Kauntiran te taun (town) aika TUC, BTC ao Kiritimati Urban Council i an ana buoka Niu Tiran.

N 9 Beberuare, 2011, ao e a kamatoaki katean te botaki aei n te boraraoi ae e tiainaki irouia Meeia mai i aon Kiribati n aia bowi are e karaoaki n te BTC, Betio.

N Okitobwa, 2011, ao e katabwenaki kateana n te babaro ae e uarereke, are e kainaki irouia onoman Meeia, are e karaoaki iai te Ointua (constitution), te Babaire ni Karikirake (strategic plan) ao babaire ibukin te birimwane irouia membwa.

Taben ao bonganan te LGA

Iai LGA n angiin aba i tinanikun Kiribati ake a kateaki irouia botakin Tautaeka Inanoa ao ni karaoi tabeia aika a rawata ma ni bongana ibukia aia membwa. Iai teniua karinanin taben te LGA bwa:

1. Te tia tei ibukia Kauntira i aon karekean kinakia, karineaia ao buokaia man te Tautaeka (lobby). E turuturu n te tabe aei te mwakuri i aon karinan aia iango Kauntira inanon ana kainibaire (policy) te Tautaeka, ke bitakin kainibaire akanne ibukin rikirakeia Kauntira.
2. Wakinan mwakuri aika a kainanoaki (service provider). E turuturu n te tabe aei karekean buoka nakoia Kauntira n aron wakinan taian reirei, kakae (research), aia ibuobuoki taan rabakau (consultancies), wakinan te bobwai n te bwanin are e na kaboraoa riki boon bwai ibukia Kauntira, ao tabeua riki. Mwakuri aikai ake a na mwanenaki irouia taan anga te buoka, ke a na kaboaki mai irouia Kauntira n te bo ae e riai.
3. Kaungaan te reitaki ao karekean ma kabutanakoan taian rongorong. E turuturu n te tabe aei katean bota-n-rongorong (database), bwai ni kaongora n aron te nutibebwa ao website i aon aia konabwai ao kakamwakuri Kauntira aika a tamaroa, ao kateimatoan te rereitaki imarenaia ao nakoia Kauntira ao aia itabon.

Aikai riki taben te LGA:-

- Kaungaan te Tautaeka ni kana-koi mwakana ao tabena nakoia Kauntira ao ni karaka aia konabwai ibukin wakinan taabe ma mwaka akanne bwa a na nako raio. (Decentralisation).
- Karakaan aia konabwai Kauntira ibukin karekean ao tikotiko-

nakin aia mwane ao kaubwaia ibukin kabutan aia waki ao ibukin karekean buoka karikirake bon ibukia ao ibukia aia botanaomata.

- Te rabwata ae e Inaomata Itinanikun te Tautaeka (NGO) are e na tauraoi ni wakini kairikirake ibukia rabwata, i Kiribati ao mai tinaniku, ake a ti mwamwakuri ma NGOs ibukin butimwaeen ao tibwatiban aia mwane ni buoka.

- Te rabwata are e na tei ibukia Kauntira n taian bowi i Kiribati ao i tinaniku.

Buoka nakon te LGA

E kakoauaki bonganan Aia Rabwata Kauntira iroun te Tautaeka ni Kiribati ao aba ma botaki aika a bubura n aban tinaniku. Ibukin aei ao a rawata naba buoka aika a kona n reke nakon te rabwata aei. E kantaningaki bwa a na raka mwane ao anga ni buoka nakoia Kauntira ao Kiribati rinanon Aia Rabwata Kauntira ngkana e a bon tei raio ma ni kinaki. N te tai aei ao aikai rabwata ake a tia ke a tauraoi ni buoka katean ao ana mwakuri te LGA i Kiribati:

1. ARIAL Programme—Aio te waki ni karikirake ae e mwanenaki iroun te EU, ibukin buoka katean LGA n aonon Aberika, te Karibian (Caribbean) ao te Betebeke.
2. VNG—Aio aia rabwata Botaki n Tautaeka Inanoa i aon te Netherlands (aban Eurobe) are e buoka Kiribati ni katea ana LGA.
3. CLGF—Te rabwata are e teimatoa ni buokia Kauntira ao ni buoka naba katean te LGA i Kiribati.
4. FSPI— te rabwata are e ikarekebai ma te VNG ao te CLGF ibukin katean te LGA i Kiribati.



Te KiLGA Newsletter bon ana bebwa ni kaongora Aia Rabwata Kauntira i Kiribati.

- E karaoaki, tirinanoaki ao ni bweretiaki n Aobitin te Kiribati Local Government Association;
- E mwanenaki irouia botaki aika Aia Rabwata Kauntira, ao te VNG International, man te Netherlands.
- Ibukin rongorongon ke taian titiraki ao retiraki ma te aobiti n te atureti ae i nano.

Kiribati Local Government Association
Betio Town Council,
P.O. Box 477
Betio, Tarawa
KIRIBATI
Your Address Line 4
Phone: (686) 50531; 26477; 26278
Fax: (686) 25250
E-mail: rtakeke@yahoo.com

RIKIRAKEIA KAUNTIRA IBUKIA AIA
BOTANAOMATA BON MAN REITAKIA



Tera te KiLGA?

Te *Kiribati Local Government Association*, (KiLGA), bon Aia Rabwata Kauntira i aon Kiribati.

E kateaki ibukin karikirakean aroia ao aia konabwai Kauntira aika 23 bwa Makin, Butaritari, Marakei, Abaiang, Eutan Tarawa, Tarawa Urban, Betio Town, Maiana, Kuria, Aranuka, Abemama, Nonouti, Tabiteuea Meang, Tabiteuea Maiaki, Beru, Nikunau, Onotoa, Tamana, Arorae, Kiritimati Urban, Tabuaeran, Teeraina

Bowin Aia Rabwata Kauntira n te Betebeke (... man It. 1)

E anga naba ana ibuobuoki Irene Oostveen, te aobitia temanna man te VNG, are aia Rabwata Kauntira n te aba ae Netherlands, are e mwanena ao e buoka te karikirake ae te Kiribati Local Government Association Project, are e a waki ngkai ni katea Aia Rabwata Kauntira i Kiribati.

E oti n ana ribooti Irene Oostveen, bwa iai te karikirake ae e mwanenaki man te EU, ae e ataaki n arana ae te ARIAL Programme, are e tauraoni n anga te buoka nakoia Aia Botaki Kauntira ake a tia n tei, ao ake a tabe ni kateaki n aban te Betebeke,

Aberika ao te Karibian (Caribbean).

E oti man taian ri-booti ake a tabekaki mai irouia taan kaea te bowi bwa ti Kiribati ngkai ae e a bobonga riki katean aia Rabwata Kauntira, (LGA) iai. E ngae n anne ao e noraki nanoia aba ake nikirana bwa a kan katea naba aia Rabwata Kauntira i ab-aia.

E korakora boutokaan aia Rabwata Kauntira (LGA) n tai aikai irouia botakin te aonnaba aika a rawata, ibukin noran bonganaia nakon rikirakeia Kauntira

ma aia tani mwakuri ao aia botanaomata. Teuana te buoka ae ataaki bon wakinan te reirei ao te kataneiai nakoia Kauntira i aon kabutan aia waki, karoan raoi tabeia ao karikirakean kaub-waia.

E kaeaki te bowi aei irouia tani kairiri man LGA mai Toromon, Tuvalu, Vanuatu ao Kiribati. A tei ibukin Kiribati Romano Reo, te Tia Babaire n te Kiribati Local Government Association, ao Rikiau Takeke, te Manatia n te karikirake ae te LGA Project.